

<County: Lancashire>

<Code: L0113>

<MS reference: Preston, Lancashire County Record Office, DD1b Culcheth 1381>

<Text: Memorandum of evidences>

These arne yo euiden<ill><2 chars></ill>s shewed before Elys of Entwysell by comaundement of my lord of Dureme for Richard of Radclif agaynes
 Nicholas of Risley of *certeyn* lond betwene hom in debate ; yat is for to say of a *certeyn* More & Mosse & J . Mese & xv . acre of lond y^t
 was sumtyme *parcell* of ye forsaide More & Mosse
 ¶ Richard wykynson@ the wryght sworne & examynt sais on his othe y^t he was . xl yere olde at yo forme deth & born w^t-in ye tou@ of Culchith and dwellet there . lx . yere and sais yat he was by qwen Richard of Radclif & Robart of Risley acordet y^t yo forsaide xv acre *parcell* of yo forsaide More & other xv acre ye wheche Robart of Risley had & yis Nicholas has nowe of ye queche ye ton ende lys to ye Redyshagh shuld be departe <ill><c.1 word></ill> of yat wast yat was in comyn bytwene *homme* ; and thor-vpon he sais he sagh *homme* cast cawle & loot so y^t ye . xv . acre y^t arne now in debate fellen to Richard of Radclif and yis was done by-fore the grete deth and he sais all yat More & Mosse was in comyn bytwene ye forsaide Richard of Radclif & Robart and he herd neuer say ye *contrary* therof er this debate fell and the forsaide Robart sayd he wold noght for his . x . oxyn yat ye cauell had fallen other was then hit did for hit legh so negh his tenautes
 ¶ John atkynson@ sworne & examynt says he was . xvj yere old at ye forme deth and acordes in all thynges to the forsaide Ric~ wykynson@ saue y^t he sais he was born in Neuton@ w^t-in . ij . Myle to the forsaide lond and has dwellet in Culchith . xxviij . yere saue y^t he was noght by at the *departeson*
 ¶ Atkyn Jakson@ sworne & examynt says he was . xvj . yere in the forme deth borne & alway dwelland in Culchith acordes to the sayng of Richard wykynson@ in all thynges and awre y^t sais yat he was by when Margery Richardes Moder of Radclif made to take *certain* cappulles of tenautes of Sotheworth vp-on the forsaide mene Mosse and send



hym to Robart of Risley

to bid hym come & help to penyssh for pasturyng on hor mene Mosse And he said ther was More & Mosse enogh for hir & all

hir kyn and hym and his kyn for euer-more & he wold penyssh no pore folke ther-fore

¶ Adam of longshagh sworne & examynt sais he was . iiij . yere olde in the forme deth and sais he was *seruaunt* to Robart wyf

of Risley sone after the forme deth and sais yat he herd *neuer* say before this debate but y^t this More & Mosse werne in comyn

bytwene the hayres of Radclif & Risley ; and y^t the lond was *departyt* in the *maner* as Richard *wylkynson@* sayde

¶ Ric~ the hunt borne in Culchith and dwelland . lx . yere sworne & examynt sais he was . iiij . yere old in the forme deth

acordes in all thynges to Adam of longshagh saue y^t he was not *seruant* to Robartes wyf of Risley Rog~ atkynson@ of . l . yere olde borne & dwelland in Culchith sworne & examynt sais y^t atkyn his fader told ^[hym] y^t he was by

at the *departeson@* of the lond before-said & mete & mesuret hit w^t his hond and of the remenant acordes to Richard the hunt

And all these byfore-said sayn vp-on hor oth y^t Richardes tenauntes of Radclif & James tenant~ of Radclif hauen doluen

turves contynule fro yere to yere and y^t the forsaid Richard & James han sold turves contynuely fro yere to yere to hor vse